

INUIT ATAQATIGIIT

INATSISARTUNI



UPA 2014/48

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Innuttaasuni utoqqaat amerlignaluttuinnarnerat eqqarsaatigalugu utoqqarnik isumassuinitinnut ilaatillugu utoqqarnut ininik neqerooruteqartarnerput siumut sammisooqqullugulu ullutsinnut naleqquttooqqullugu utoqqarnut inissianut tunngatillugu suliasaqarfimmi pilersaarusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta q Aqqaluaq B. Egede, Inuit Ataqatigiit)

Tunngavilersuut

Kalaallit Nunarput, inuiaqatigiillu kalaallit tassaasariaqarput meeraalluarsimasutut misigisimaffiusussat. Aamma inuusuttutut inersimasutullu inuulluataarfiunitta nangitsigisariaqarpaa, nuna manna tassaassammat utoqqaliffissatsialak. Inuit amerlavallaaqaat utoqqalinerminni nunatsinni inuuniarnikkut atugassarititaasut pissutigalugit nunatta avataanut nuuttartut. Tamanna akuerineqarsinnaangilaq, aamma taamaattussaannartut isigineqassanngimmat siunnersuut una aallartiffissatut saqqummiuppara.

Nunatsinni inuppassuaqarpoq utoqqalinerminni atukkaminik naammagisimaarinnittunik. Siunnersuuteqarninni suut tamarmik ajorluinnartuunerannik oqariartuuteqanngilanga. Kisianni aamma oqaatigissavara ullumikkut utoqqaat illui, qanorlu atugassaqartitaanerata, aamma inuttut pisinnaatitaaffimminnik qanorlu atugassaqartitaanissaminik illersugaanerata pitsaernerpaajungitsaq arajutsisimangilara.

Utoqqalinerminni sulinerminni inuussutissarsiutaarussimasutut utoqqaat illuini inississimasutut imminut takorluussaguma, nalunngilara piffissap annerpaartaa utoqqaat illuini inuulissallunga. Kissaatigissagaluarpara illup iluani atugassarititaasut kiffartuunneqarnerlu pitsaasuunissaat. Sammisassaqartitaanissaq aliikkusersorneqarnissarlu aamma uannut kissaataassagaluarpoq. Qularutigingilara ullumikkut sumiiffiit ilaanni tamakku eqquutsillugit atugassaqartitsisoqartoq.

Aamma kissaatigissagaluarpara nunatsinni pinngortitaq kusanaqisoq, inuullu misigissutsimigut atugarissaarnissaanut ilapittuutaasoq isikkivigissallugu. Utoqqaat illuisa silataanni atugassarititaasut eqqissisimanartuunissaat, atoruminartuunissaallu pingaartissagaluarpakka, il.il.

Siunnersuutima tunngavilersutaani oqaatigisakka assersuutaapput, allanik ilaartorneqarsinnaasut isummersornissamut aallarniutaasinnaasut. Qitiutitarali unaavoq, nunatsinni utoqqaat amerliartornerata ilutigalugu siunissami utoqqaat illuini pisariaqartitsineq anner-tunerulertussa, utoqqartatsinnut misigissuseqartumik pilersaarusiornermik malitseqartinneqassasoq. Utoqqaat illuini sanaartorneq inissaqartitsiniaannarluni sanaartornikkut ingerlanneqassanngippat pilersaarusiortoqartariaqarpoq. Aamma sinaakktissanik ersarisunik piumasaqaateqalernissaq avaqunneqarsinnaanngitsutut isigaara.

Siunertaq anguneqarsinnaangilaq oqallinnikkut aporfissat isiginiaqqaassagaanni, anguneqarsinnaangilaq politikikkut partiit akornanni pisut aallaavigissagaanni. Siunertaq anguneqassappat piumasaqaateqarnissarput, kajumissuseqarnissarput, suleqatigiillutalu utoqqartatta inuttut pisinnaatitaaffiini illersuutini atuutsitsilernikkut aatsaat timitaliisoqarsinnaavoq. Siunnersuutip siunertaraa naalakkersuinikkut suliniartoqassasoq, utoqqaat atugarisaat sanaartugassatigut utoqqaat illuisa ilusissaat kisiat eqqarsaatiginagu,

misigissutsit aamma atoruminartuussappata avatangiisit, isikkiviit pinngortitallu utoqqaap inuuneranut qanilaartinneqarlutik ilaatinneqarnissaat anguniarneqassasoq.

Isumaqarpunga nunatsinni sumiiffinni amerlavallaani utoqqaat illuinik sanaartornermi inissisimaffik, isikkivik avatangiisillu qanoq ittuunerat eqqarsaatiginerullugu ingerlatsisoqarsimasinnaagaluartoq. Kalaallit Nunaat, inuiaqatigiillu kalaallit utoqqartaminnik isumasuisut atugarissaartitsisullu timitaliiffigerusullugu, siunnersuut una Inatsisartunut ilaasortanut aalajangiiffigisassanngorlugu ingerlatippara. Neriullunga naggataarutaasumik oqaaseqarnissanni isummat katersuussimasut qujassuteqarfigisinnaassallugit.

Pisortani aningaasaqarnikkut allaffissornikkullu kingunerisassaat

Ininik neqerooruteqartarnerup utoqqarnillu isumassuinerup nutarterneqarnissaanut, piorsarneqarnissaanut annertusarneqarnissaanullu isumalluutinik tulleriarinermi siumut sammisumik qanoq aalajangertoqarumaanera naalackersuinikkut qinigassaavoq. Pisortat ingerlatsineranni killiliussat periarfissallu iluini siumut isigaluni tulleriarinerit tamakku pisussaapput. Aningaasaqarnikkut kingunerisassat maannangaaq erseqqinnerusumik oqaatigineqarsinnaanngillat sanaartugassanik isumassuinerumullu neqeroorutinik tigussaasunik siunnersuut imaqaanngimmat.

Suliassaqarfimmi pilersaarusiormut matumunnga atatillugu pisortat allaffissornikkut aqutsinermut aningaasartuuteqassapput. Taamaattorli naatsorsuutigineqanngilaq ukioq kaajallallugu AC-itut sulinerup sisamarterutaa sinnerlugu aningaasartuuteqartoqarumaartoq. Ilanngullugu malugisariaqarpoq tigussaasumik naalackersuinikkut aalajangikkanut toqqamavilersuisunik pisortat sanaartugassanut sanaartornermullu tunngasunik pilersaarusiormik sammisaqartunik Naalackersuisut sulisoqareermata.

Namminersorlutik inuussutissarsiortunut aningaasaqarnikkut allaffissornikkullu kingunerisassaat

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunerisassaat

Innuttaasunut aningaasaqarnikkut allaffissornikkullu kinguneqassanngilaq.